

■ CONVIVENZA

La vusch

DA PIEDER CAMINADA*

Enconuschais Vus Henrik Rhyn? Probabilmente betg. Henrik Rhyn è in cumpogn universal. El è stà actur e lura oravant tut scriptur da gieus auditivs e televisivs avant ch'el ha lavurà sco redactur tar radio SRF. En il fratemp è el entrà en pensiun activa (artistica). Ed el ha ina vusch magnifica.

Tgi che auda a pledar Henrik Rhyn crai d'udir musica. Sia vusch bassa e chauda e ses dialect melodijs da Soloturn mainan ins cun facilitad en auters munds. Avant in'eternitad hai jau vesì Henrik Rhyn ina giada ad ina prelecziun. El ha prelegì or d'in cudesch d'in ami. Ed ha fatg or d'in bun cudesch in cudesch fantastic. Grazia a sia vusch ch'el ha utilisà a moda virtuosa sco in instrument. Tge daletg!

Ma i dat er autras vuschs. Vuschs ch'ins na po betg supportar. Perquai ch'ellas èn memia gizzas. Memia monotonas, memia canerusas u memia da bass. Perquai ch'ellas pipegian u cratschlan. U perquai ch'ellas han ina singularitad disturbanta. E gia èsi succedi: ins sa concentrescha be pli sin la vusch e betg pli sin quai che la vusch di.

Dacurt sun jau sesì sin la tribuna da la piazza da ballape Crap Gries a Schluein ed hai guardà il gieu da mia anteriura squadra cunter il club da ballape da Montlingen. E qua era ella tuttenina, questa vusch che resuna enfin oz malempernaivlamain en mias ureglias. Ella vegniva or da la retscha davos mai. Ed ella tschantschava senza pausa. E bler memia canerusamain. Ina vusch cra-



tschlanta d'ina dunna. Tge che la vusch scheva n'hai jau a l'entschatta betg pudì m'accorscher, perquai che jau hai – sco per sforz – be pli pudì ma concentrar sin questa vusch penetranta.

Insacura hai jau tadlà in zic pli exactamain. Quai avess jau meglier laschè star. La vusch fascheva cuntinuada main beffas dals giugaders da Schluein Glion. Quels sajan tuts «asilants» e «jugos» (ella duvrava consequentamain questas blastemmas). Ed ella dumandava plain odi, sch'ins saja i per in u l'auter dals giugaders en il «center d'asilants» che stat sin l'autra vart da la vallada aut sur il vitg da Schluein. Jau hai respirà profundamain, hai be vulì guardar ballape e betg m'agitar da questa vusch.

Enfin che jau sun explo-di. Jau ma sun vulvi, hai guardà en fatscha a la dunna cun la vusch nauscha e ditg ad ella che jau na veglia betg pli tadlar ses baterlim primitiv e che jau midia ussa plazza. Per in curt mument è la vusch – per mai sorprendentamain – restada mitta. Tge ch'ella ha ditg silsuenter na sai jau betg, perquai che jau aveva tschertgà ina nova plazza, nua che jau n'hai betg pli pudì udir ella.

Jau conced, atgnamain n'èsi betg fair da chattar ina persuna simpatica u nunsimpatica be pervia da

sia vusch. L'atgna vusch na pon ins betg influenzer. Quai ch'ins di però bain. Exact per quest motiv muss'ins als uffants ch'els duajan l'emprim pensar avant che discurre. Ma tge, sch'ins n'ha betg gi' ina buna educaziun? U sch'ins na po betg pensar?

Dal reminent, la vusch che m'ha fatg ir da las paraids si tutgava ad ina dunna pli veglia da Montlingen ch'è sa revelada sco grond fan da sia squadra. Be tgutg che tar il club da ballape da Montlingen giogan umans che taidlan sin nums sco Berisha, Topduman, Zdravkovic ubain Abd El Hai. Sch'els èn Svizzers nati-ralisads ubain esters è dal tuttafatg irrelevant. Els giogan simplamain ballape ensem cun ils Erlachners, ils Kühnes ed ils Lüchingers e quai a moda passiunada – ed els avessan merità megliers fans. Ils ins sco ils auters.

* Pieder Caminada è mainaproject da la scolaziun e redactur tar la «Südostschweiz». El è creschì si a Glion en in ambient per gronda part tudestg e viva oz en il vitg rumantsch da Castrisch.

Vocabulari

cumpogn universal – hier: Tausendsassa
 gieu auditiv – Hörspiel
 fratemp – Zwischenzeit
 tge daletg! – was für ein Genuss!
 giz, gizza – schrill
 canerus – laut, lärmig
 da bass – leise
 pipegiar – piepsen
 cratschlar – krächzen
 singularitad disturbanta – verstörende Auffälligkeit
 s'accorscher – wahrnehmen
 far beffas – hier: höhnen
 blastemma – Schimpfwort
 plain odi – voller Hass
 baterlim primitiv – primitives Geschwätz
 conceder – zugeben
 far ir da las paraids si – hier: auf die Palme bringen
 be tgutg – dumm nur
 Svizzer nati-ralisà – eingebürgerter Schweizer

Unterstützt von der Lia Rumantscha



Lia Rumantscha